

आकाशवाणी जयपुर—अजमेर

प्रादेशिक समाचार

दिनांक 10.10.2024

समय: 18.45 बजे

000

- मुख्यमंत्री भजनलाल शर्मा कह्यो— राइजिंग राजस्थान ग्लोबल इन्वेस्टमेंट समिट ऊं प्रदेश रा उद्योगां ने नुवी दिशा मिलेला।
- रीट परीक्षा री तैयारी रा बारा मांय विचार करण सारू शिक्षा विभाग रा आला अहलकारां री मीटिंग—इम्तेहान आवता साल जनवरी मांय।
- देवलोक व्ह्या नामचीन उद्योगपति रतन टाटा रो मुम्बई मांय सरकारी मान सागे अंतिम संस्कार करी ज्यो।
- प्रदेश मांय केई ठोड़ां छांटा छिडका अर हल्की बारिश रा समाचार।

000

मुख्यमंत्री भजनलाल शर्मा कह्यो है के राइजिंग राजस्थान ग्लोबल इन्वेस्टमेंट समिट ऊं प्रदेश रा उद्योगां ने नुवी दिशा मिलेला। शर्मा आज जयपुर मांय राइजिंग राजस्थान समिट रा बारा मांय माली हलका रा पेशेवरां सागे मीटिंग मांय बोल रह्या हा। वे कह्यो के राज्य मांय कुदरती साधनां री मोटी तादाद मांय मौजूदगी रे कारण निवेश री मोकळी संभावनावां है। वे भरोसो जतायो के पेशेवर लोग राज्य ने निवेश रो हब बणावण अर बत्तो ऊं बत्तो निवेश लावण मांय खास काम करेला। मुख्यमंत्री कह्यो के बिजली, पाणी अर बुनियादी ढांचा हलका रा विकास सारू योजना बणा र काम करण माथे सरकार रो खास ध्यान है। वे बतायो के राज्य सरकार बिजली हलका मांय 2 लाख 24 हजार करोड़ रुपया रा करा र कीना है। मुख्यमंत्री कह्यो के आवता पांच साल मांय 53 हजार किलोमीटर लम्बी सड़कां बणावण अर नौ ग्रीन-फील्ड एक्सप्रेस वे विकसित करण री योजना है।

000

केंद्र सरकार आज राज्य सरकारां सारू कर मांय भागीदारी री एक लाख 78 हजार करोड़ रुपया ऊं बत्ती रकम जारी कीनी। वित्त मंत्रालय रे मुजब आवता त्यौहारां अर राज्यां रा पूंजीगत खर्च मांय तेजी लावण अर विकास रा काम आगे बधावण सारू एडवांस किश्त जारी करी ज्यी है। इण रा तैत राजस्थान ने 10 हजार 737 करोड़ रुपया दिया ज्या है।

000

प्रधानमंत्री नरेन्द्र मोदी री अगुवाई वाली केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा रही है। इण मांय आज पेश है कौशल विकास अर उद्यमशीलता मंत्रालय कानी ऊं ई मियाद मांय सरू करीजी नुवी योजना री जाणकारी —

मंत्रालय मांय स्वतंत्र प्रभार वाला मंत्री जयंत चौधरी ई साल जुलाई महीना मांय मॉडल कौशल ऋण योजना मांय बदलाव रो ऐलाण कीनो। इण मांय सरकार री गारंटी सागे साढे सात लाख रुपया ताई रा कर्ज रो सुबीतो दियो ज्यो है जिण ऊं हर साल 25 हजार विद्यार्थियां ने फायदो मिलेला। मौजूदा योजनावां रो फायदो नी ले सकबा वालां सारू देश रा कॉलेजां मांय भणाई सारू 10 लाख रुपया ताई रा कर्ज मुहैया कराया जावेला।

ई रा तैत ई—वाचवर रे जरिये हर साल 1 लाख विद्यार्थियां सारू ब्याज मांय 3 फीसदी सालाना री छूट दी जावेला।

000

प्रधानमंत्री नरेन्द्र मोदी री अगुवाई वाली केन्द्र सरकार रा तीजा कार्यकाल रा पहला एक सौ दिन मांय आयुष मंत्रालय केई देशां री संस्थावां सागे करार कीना है। जयपुर मांय राष्ट्रीय आयुर्वेद संस्थान रा कुलपति डॉ. संजीव शर्मा आज आयुष मंत्रालय कानी ऊं मौजूदा सरकार रा पहला सौ दिन मांय करी ज्या कामां री जाणकारी दीनी। शर्मा बतायो के मंत्रालय कानी ऊं आयुष ने बधावो देवण रा मकसद ऊं संयुक्त राष्ट्र संघ, वियतनाम, मलेशिया अर फिलीपीन्स रा संस्थानां सागे करार कीना है।

000

रीट परीक्षा री तैयारियां रो जायजो लेवण सारू आज स्कूल शिक्षा विभाग रा शासन सचिव कुष्ण कुणाल जयपुर मांय अहलकारां सागे मीटिंग कीनी। अध्यापक लेवल-1 अर लेवल-2 री पात्रता सारू माध्यमिक शिक्षा बोर्ड राजस्थान ने रीट परीक्षा करावण री नोडल एजेंसी बणायी ज्यी है। परीक्षा जनवरी 2025 रा दूजा पखवाडा मांय करावण रा आसार है।

000

देवलोक व्ह्या नामचीन उद्योगपति अर समाजसेवी रतन टाटा रो आज सिंज्यां मुम्बई रा वर्ली श्मशान घाट माथे पूरा सरकारी मान सागे अंतिम संस्कार कर दियो ज्यो। देवलोक व्ह्या रतन टाटा ने आखिरी विदाई देवण सारू केन्द्रीय मंत्री अमित शाह, पीयूष गोयल, रामदास अठावले, न्यारा-न्यारा राज्यां रा मुख्यमंत्री, जनता रा नुमाइंदा, न्यारा-न्यारा उद्योगपति अर मोकळी जनता मौजूद रही। इण ऊं पैली रतन टाटा री पार्थिव देह ने आखिरी दर्शन सारू राष्ट्रीय प्रदर्शन कला केन्द्र मांय राख्यी ज्यी। ध्यानजोग है के रतन टाटा काल रात मुम्बई रा एक अस्पताल मांय देवलोक व्हे गया हा।

000

प्रदेश रा सगळा सरकारी अस्पतालां मांय मरम्मत रा काम योजना बणा र कर्या जावेला। चिकित्सा मंत्री गजेन्द्र सिंह खींवरसर आज जयपुर मांय जनाना अस्पताल रा दौरा पाछे अहलकारां सागे मीटिंग कर र ई बाबत जरूरी हुकम दीना। मीटिंग मांय चिकित्सा मंत्री जयपुर रा सवाई मानसिंह मेडिकल कॉलेज ऊं जुड्या अस्पतालां रा कामकाज रो जायजो लीनो। वे कह्यो है के मरीजां, वां रा पिरवार वाळां अर स्वास्थ्य कर्मचारियां री हिफाजत ने ध्यान राखता थकां टेम-टेम परां अस्पतालां मांय मरम्मत रा काम करावणा जरूरी है। वे अहलकारां ने आवता दो महीनां मांय सगळा सरकारी अस्पतालां अर डिस्पेन्सरी रा भवनां री जांच करा र रपट पेश करण रा हुकम दीना। खींवरसर मरम्मत रा काम करावण सारू एकीकृत प्लान तैयार करण रा हुकम दीना।

000

आज विश्व मानसिक स्वास्थ्य दिवस मनायी ज्यो। ओ दिन मानसिक स्वास्थ्य रा बारा मांय जाग जगावण अर दुनिया मांय मानसिक स्वास्थ्य ऊं जुड्या सुबीता बधावण री कोशिशां ने मजबूत बणावण सारू मनायो जावे है। ई मौके स्वास्थ्य अर परिवार कल्याण मंत्रालय आज नई दिल्ली मांय टेली मानस ऐप अर वीडियो कॉल रा सुबीता री सरूआत कीनी। कार्यक्रम मांय विश्व स्वास्थ्य संगठन-डब्ल्यूएचओ टेली मानस मूल्यांकन रपट अर कर्मचारियां सारू एक स्व-देखभाल मॉड्यूल ई लॉन्च करी ज्यो। मनोचिकित्सकां रे मुजब तनाव, अवसाद अर चिंता एक संक्रमण री भांत है जो दूजा लोगां ने ई फेंट मांय ले लेवे है। जयपुर रा वरिष्ठ मनोरोग चिकित्सक डॉक्टर आई डी गुप्ता रे मुजब पिरवार मांय एक जणा रे तनाव या अवसाद मांय आवण ऊं पूरा पिरवार माथे असर पड़े है। वे कह्यो के अकेलो जीवन, भेळा पिरवार टूटण अर काम रो दबाव मनोरोग रा खास कारण है।

000

प्रदेश मांय ई विश्व मानसिक स्वास्थ्य दिवस रे मौके मानसिक स्वास्थ्य रा बारा मांय जाग जगावण सारू न्यारा-न्यारा कार्यक्रम राख्यी ज्यो। भरतपुर जिला रा भुसावर मांय चिकित्सा

अर स्वास्थ्य विभाग री ओर ऊं संगोष्ठी राखी ज्यी। सवाईमाधोपुर अर करौली मांय ई संगोष्ठी राखी ज्यी। आं संगोष्ठियां मांय काम री ठोड़ां अर आम जिंदगी मांय तनाव आगो राखण सारू नशा ऊं दूर रेहवण, रोजीना कसरत करण अर योगाभ्यास अपनावण माथे ज़ोर दियो ज्यो। ई मौके पाली रा मानसिक विमन्दित विशेष विद्यालय मांय खास कार्यक्रम राखी ज्यो।

000

प्रदेश मांय आज केई ठोड़ां हल्की बारिश व्ही अर कठे-कठे छांटो-छिड़को व्ह्यो। जयपुर मांय बादळां री आवाजाही बीचे दोपहरां री बगत कठे-कठे छांटा पड़्या। सांचौर, पाली अर सवाईमाधोपुर जिलां मांय बादळा मंडबा सागे सीळो बायरो बाजण ऊं मौसम खुशनुमा व्हे ग्यो। आं जिलां मांय केई ठोड़ां हल्की बरसात व्ही, जिण ऊं उमस ऊं थोड़ो आराम मिल्यो। झालावाड जिला मांय ई बादळा मंड्या रह्या अर कठे-कठे छांटो-छिड़को व्ह्यो। बांसवाड़ा मांय आवता दो दिन गहरा बादळा मंड्या रेहवण अर छांटो छिड़को व्हेवण रा आसार न ध्यान राखता थकां किसानां ने साखां री कटाई नी करण अर काट्योड़ी साखां हिफाजत सागे राखण री राय दीरीजी है। मौसम विभाग आज ऊं थावर ताई कोटा, उदयपुर अर अजमेर संभाग मांय कठे-कठे हल्की बिरखा रा आसार जताया है।

000

सांचौर जिला मांय नेशनल हाईवे नं. 68 माथे आज एक गाड़ी कानी ऊं मोटरसाईकिल ने टक्कर मार देवण रे कारण व्ह्या हादसा मांय तीन जणां री मौत व्हे ग्यी। एक और हादसा मांय रामगंजमण्डी रा लसूडिया गांव कने दिल्ली-मुंबई एक्सप्रेस-वे माथे टैक्सी पलट जावण ऊं एक जणा री मौत व्हे ग्यी अर चार जणा घणा ज़ख्मी व्हे ग्या। नागौर जिला रा रहवासी ऐ लोग मध्यप्रदेश रा उज्जैन मांय किण ई कार्यक्रम मांय सिरकत कर र पाछा आ रह्या हा।

000

मुख्यमंत्री भजनलाल शर्मा आज जयपुर मांय राज्यपाल हरिभाऊ बागडे सागे मुलाकात कीनी। वे प्रदेश रा विकास ऊं जुड़्या न्यारा-न्यारा मुद्दां माथे चर्चा कीनी। सार्वजनिक निर्माण, महिला अर बाल विकास मंत्री डॉ. मंजू बाघमार ई राज्यपाल सागे मुलाकात कीनी।

000

केकड़ी मांय खेली ज्यी राज्य स्तर री 68 वीं सॉफ्टबॉल होड़ आज पूरी व्हे ग्यी। होड़ रा 17 साल आयु वर्ग मांय हनुमानगढ़ अर 19 साल आयु वर्ग मांय बीकानेर खिताब जीत्या जदके श्रीगंगानगर अर नीम का थाना री टीमां दूजी ठोड़ माथे अर शाहपुरा अर हनुमानगढ़ री टीमां तीजी ठोड़ माथे रही। नागौर जिला रा पांचला सिध्दा री पीएम श्री जयराम गीता देवी बेनीवाल सरकारी सीनियर सैकेंडरी स्कूल मांय राखी ज्यी राज्य स्तर री 68वीं छात्रा वॉलीबॉल होड़ ई पूरी व्हे ग्यी। जल संसाधन मंत्री सुरेश सिंह रावत समापन जळसा मांय खास पावणा रा तौर ऊं सिरकत कीनी।

000

अन्तर्राष्ट्रीय बालिका दिवस रा साप्ताहिक कार्यक्रम पूरा व्हेवण रे मौके आज जैसलमेर मांय जिला प्रशासन अर महिला अधिकारिता विभाग री ओर ऊं जिला री होशियार टाबरियां रो मान करी ज्यो। श्रीगंगानगर मांय पुलिस पब्लिक पंचायत राखी ज्यी। पंचायत मांय बीकानेर, श्रीगंगानगर, हनुमानगढ़ अर अनूपगढ़ जिलां री लड़कियां री 100 स्कूलां री साढे पन्द्रह हजार ऊं बत्ती टाबरियां सिरकत कीनी। भविष्य के लिए बेटियों का दृष्टिकोण मुद्दा माथे राखी ज्यी पंचायत रो मकसद बेटियां ने वां रा हक शिक्षा, महिला सुरक्षा, अर साइबर अपराधां ऊं बचाव रा बारा मांय जाणकारी देवणो हो। ई मौके पारिवारिक वानिकी: घर-घर सहजन अभियान सारू करी ज्यो। ई रा तैत सहजन रा एक लाख बीज अर चुनिंदा स्कूलां मांय सहजन रा अढाई हजार पौधां टाबरियां ने दिया ज्यो।

000

गृहमंत्री अमित शाह उद्योगों के स्तर और आकार बधावण बाबत कहते हैं। वे आज नई दिल्ली में पीएचडी चैंबर ऑफ कॉमर्स एंड इंडस्ट्री का वार्षिक सत्र में बोल रहे हैं। शाह कहते हैं देश के उद्योगों ने दुनिया भर में काम करने में सफलता हासिल की है। गृहमंत्री कहते हैं कि सरकारी और उद्योगों ने मिल कर काम करने की जरूरत है। गृह मंत्री कहते हैं सरकार दो हजार के बजट के अंतर्गत कानून हटाने, कंपनी कानून में सुधार करने का है और 39 हजार के बजट के अंतर्गत पालना आसान बनाया है।

000